

四庫全書

史部

欽定四庫全書

九朝編年備考卷八

宋 陳均 撰

真宗皇帝

起壬子大中祥符五年
止乾興壬戌元年

壬子大中祥符五年春正月河決棣州

時著作佐郎李垂上導河形勢書三篇并圖詔任中
正陳彭年等詳定中正等言侵占民田頗為煩費興
行匪易而博洽可獎 八年徙城於州之北七十里以
避河流既而大水沒故城丈餘

二月京西饑

募富民出粟振糶

三月親試舉人

賜徐奭以下一百餘人及第出身有差

給官印紙起草并摹印御題賜之

夏四月以向敏中為平章事

敏中再掌留任以厚重鎮靜人情帖然上嘉之故復相

初上之將北征也敏中時知永興軍上深念北鄙賜
以便宜詔敏中得詔藏之不下視事如他日會郡人
大儺有告禁卒欲倚儺為亂者因伏甲幕中召賓
僚置酒縱閱儺入揮伏甲盡擒之果各懷短刀即席
誅勦命布灰掃庭張樂宴飲如初上亦知其任重有
再用之意尋知河南府至郡辨僧殺人之誣衆咸以
為神明時舊相出鎮者多不以吏事為意冠準終日
宴遊張齊賢儻蕩尤不治惟敏中勤於政事所至著

稱上曰大臣出臨方面不當如向敏中耶

六月令樞密院修時政記

故事樞密院月錄附史事送中書編於時政記至是王欽若等請別撰樞密院時政記始此

賜隱士林逋粟帛

逋恬淡好古不趨榮利家貧衣食不足晏如也結廬杭州西湖之孤山二十年足不及城市轉運使陳堯佐以其名聞詔賜粟帛長吏歲時勞問逋卒於天聖

元年臨終有茂陵他日求遺藁猶喜曾無封禪書之
句上悼之賜諡和靖先生

秋八月丙申朔日有食之

作五嶽觀

尋改為會靈觀

九月以王欽若陳堯叟為同平章事樞密使

儒臣領樞密兼使相始此

趙安仁罷

時為參知政事初議立后安仁謂劉德妃家世寒微
不如沈才人出于相門後上與王欽若從容論當今
大臣誰為長者欽若欲排安仁乃譽之曰無若趙安
仁安仁昔為沈倫所知常欲報之上始有意斥安仁
矣嘗諭王旦曰聞趙安仁在中書絕不親事旦對曰
每奏對安仁亦未嘗不與居常進擬皆同列議定方
敢取旨臣每見臨時變易於上前者皆迎合陛下意
安仁無異議是有執守上曰能如此耶朕不知也及

罷政事仍命同修史安仁雖貴簡儉若貧素喜誨誘
後進時以重德歸焉

以丁謂參知政事

王欽若所薦也欽若與謂及劉承珪陳彭年林特交
通蹤跡詭祕時號五鬼初李宗諤家貧王旦常資給
之欲引宗諤為參知政事欽若知之故事參政謝日
賜物幾三千緡欽若因密奏旦欲得宗諤所賜物以
償已債上遂不許

冬十月聖祖降

卷八

先是上夢景德中所睹神人傳玉皇及天尊之命云
先令汝祖某授汝天書翌日夜復夢天尊言吾坐西
當斜設六位即于延恩殿設道場是日五鼓天尊降
曰吾人皇中九人之一人也是趙之始祖再降乃
軒轅黃帝後唐時七月一日復降主趙氏之族謂上
曰善撫育蒼生無忘前志尋上聖祖尊號曰聖祖上
靈高道九天司命保生天尊乃詔避聖祖名上曰玄

下曰朗應天慶觀並增聖祖殿以七月一日為先天節十月二十四日為降聖節尋又上聖母號曰元天

大聖后

大赦

十一月置玉清昭應宮使

以王旦為之

十二月置景福殿使

以劉承珪為之

作景靈宮奉聖祖

卷八

越明年以王旦為兗州景靈宮朝修使詔自京至兗
州察吏治民隱聽旦以便宜從事旦還言李士衡等
政績乞加褒諭又言徐懷式等無治聲令監司察之
或曰公為元宰出使所舉官吏僅得褒詔無乃太輕
乎旦曰既稱之又請亟用則上恩皆出於已矣此人
臣之大嫌也入內押班周懷政實與旦同行或請問
必俟從者皆集然後見之未嘗私焉議者以為得體

立德妃劉氏為皇后

后性警悟曉書史處置宮闈事多引故實無不適當
定三院御史員

以六員為制除差出外任及任京蒞他局者不與

癸丑大中祥符六年春正月詔兩浙發廩平糴價

轉運使言本路米價為賈販翔踴請禁之詔勿禁而
有是命

禁出使內臣干預公事

官吏不即以聞並置于罪祖宗舊制凡內臣出使皆責知委狀敢妄奏他事者伏軍令至是復有是詔

以屬籍為玉牒

尋置宗正寺修玉牒官名皇朝新譜曰仙源積慶圖

夏六月幸舍利塔

楊億罷

自翰林學士罷為太常少卿分司西京先是億嘗草答契丹書云鄰壤交歡上自注其側作朽壤鼠壤糞

壤等字億遽改為鄰境明日引唐故事學士草制有所改為不稱職亟求罷上慰諭之他日謂輔臣曰楊億真有氣性不通商量及議冊皇后劉氏上欲得億草制使丁謂諭旨億難之因請三代謂曰大年勉為此不憂不富貴曰如此富貴亦非所願也乃命他學士草制億雖頻忤旨恩禮猶不衰時王欽若驟貴億素薄之陳彭年方以文進亦忌億名出已右日相與譖之上意稍怠億嘗入直被召賜坐徐出文藁數篋

以示億曰卿識朕書跡乎皆朕自起草未嘗命臣下
代作也億惶恐不知所對億出即謀奔遁億有別墅
在陽翟會母疾億留謁告榜子與孔目吏中夕亡去
朝論喧然以為不可上亦謂王旦等曰侍從臣安得
如此自便旦曰億得罪賴陛下矜容不然顛躓必矣
然近職不可居外地今當罷之上終愛其才踰月弗
下洎億稱疾請解官乃有是命

明年秋以疾愈求入朝上謂旦曰億性峭直無所附

會文章學問無及之者然或言其好竊議朝政何如也旦曰此蓋與億不足故為誣謗耳億諧謔過當則恐有之訕讟之事保其必無也命知汝州時御史猶指前事為言上詔中書召諭之至汝州言部內秋稼甚盛粟一本至四十穗麻一本至九百角上覽其章謂輔臣曰億之詞筆冠映當世後學皆慕之王旦曰如劉筠宋綬晏殊輩相繼屬文有貞元元和風格者自億始也

秋七月瀘戎蠻寇邊

除農器稅

初知濱州呂夷簡請免稅河北農器上曰務穡勸耕
古之道也豈獨河北哉乃詔諸路並除之

置水虎翼軍

初太祖立神衛水軍江淮平不復振舉至是選在京
江淮習水卒於金明池按試戰棹而立是名

八月置禮儀院

以趙安仁陳彭年同知院事

冬十月元德皇后祔廟

至道末有司議以淑德懿德皇后並配饗太宗久未
決後禮官參議以元德皇太后實生聖嗣宜改上徽
名曰元德皇后升祔詔從之恭以神主祔于明德皇
后之次

十二月戊午朔日有食之

甲寅大中祥符七年春正月上如亳州謁太清宮

去秋詔以今春謁太清宮龍圖待制孫奭上言陛下
封泰山祀汾陰躬謁陵寢今又將祠太清宮外議籍
籍以為陛下事事效唐明皇因言明皇禍敗之跡上
以泰山汾陰非始於明皇且以開元禮今世所用乃
作解疑論以示羣臣

雍丘隱士邢惇以學術稱隱居不仕王曾薦之上還
自毫名問治道不對徐曰陛下東封西祀皆已畢矣
臣復何言上說除許州助教後卒鄉人見其勅與廢

紙束置屋梁間

升應天府為南京

作鴻慶宮

二月上至自亳州

恭謝東郊

大赦

令益州鑄當十鐵錢

三月皇子受益封慶國公

舊制國公食邑三千戶今止千戶有司之誤也皇子
即後宮李氏所生于是五年矣劉皇后以為己子使
楊婉儀保視之故仁宗嘗呼后為大孃孃婉儀為小
孃孃

五月刻天書

以王旦為刻玉使王欽若等為同刻玉使副使同副
使

折惟昌卒

先是河東民運糧赴麟州當出兵為援惟昌時已屬疾曰古人受命忘家死於官事吾無憾也即引眾冒風沙而行疾遂亟上遣使挾醫診視弗及其弟惟忠代知府州惟忠世將知兵領州事凡二十年卒於明道二年以其子繼宣代之

授嘉勒斯賚官

渭州蕃族首領也

六月王欽若罷

欽若傾巧矯誕樞密副使馬知節薄其為人未嘗詭
隨上嘗賜近臣詩誤用旁韻王旦欲白上欽若曰天
子詩豈當以禮部格校之旦遂止欽若退處密以聞
後上言及之旦唯唯知節具斥其奸狀欽若每奏事
必懷數奏但出一二匿其餘退則以已意稱上旨行
之知節嘗于上前顧欽若曰懷中奏何不盡出至是
又爭賞王懷信平蠻事上怒皆罷之

以寇準為樞密使同平章事

王旦薦之也

秋八月河決澶州

命塞之

九月親試舉人

亳州南京路張觀等二十一人除官如東封西祀例
冬十月玉清昭應宮成

宮宇總二千六百一十區初料功須十五年修宮使
丁謂令以夜繼晝繪一壁給二燭遂七年而成軍校

工匠第賞者九百餘人

十二月作元符觀

乙卯大中祥符八年春正月朔上玉皇聖號大赦定奏
陰法

承天節及南郊

二月淮浙飢

遣使巡撫

三月親試舉人

賜蔡齊以下百八人及第出身有差狀元給金吾騶
從七人傳呼聽引兩節始此

是歲禮部初置謄錄院仍詔禮部進士六舉諸科九
舉以上雖不合格並許奏名

上之親試進士也召崇文館檢討馮元講易泰卦元
因推言君道至尊臣道至卑必以誠相感乃能輔相
裁成上悅命賜五品服

夏四月召宰相觀書

觀書於玉宸殿閱御製皇王帝霸五臣等論尋以御製良臣正臣忠臣奸臣權臣五論賜宰相

寇準罷

為武勝軍節度同平章事先是準惡林特之姦邪數與忿爭特方有寵上不悅謂王旦等曰準年高屢更事朕意其必能改前非今觀所為似更甚焉旦等曰準好人懷惠又欲人畏威皆大臣所當避而準以為已任此其所短也非至仁之主孰能全之始旦之薦

準也嘗力疾入見上問以誰可代卿者再三不對上
曰張詠何如不對又問曰馬亮何如不對上曰試以
卿意言之旦強起曰以臣之愚無若寇準上憮然有
間曰準性剛褊更思其次旦曰他人臣所不知也及
準為樞密使中書事有關送樞密院礙詔格者準奏
之上以詰旦旦頓首謝既而樞密有送中書亦礙詔
格旦但令送準準大慚旦每見上必稱準之才而準
數短之上以詰旦旦曰理固當然臣久在相位缺失

必多準對陛下無所隱此臣所以重準也及準自知
當罷使人私於旦求為使相旦大驚曰使相豈可求
耶且吾不受私請準深恨之及制出準入見涕泣曰
非陛下知臣何以至是上具道旦所以薦準者準
始愧歎出語人曰王同年大度如此耶

申嚴倉庾羨餘禁

詔倉庾出納自今勿以羨餘為吏課

五月榮王元儼宮火

延燒內藏左藏庫朝元殿乾元門崇文院祕閣

求直言

有司劾遺火事當死者甚衆王旦曰陛下始以罪已
詔天下今乃過為殺戮且火雖有迹安知非天譴也
上欣然納之減死幾百人

却羨餘貢

河北轉運使李士衡言有羨餘錢四十萬緡及紬布
等詔令貯積本路士衡前後獻羨餘助郊祀東封非

一

申禁金飾服用

詔自中宮宗室皇親及外庭臣庶之家衣服器用並
不得以銷金餞金金線之類為飾

出宮人

六月己酉朔日有食之

閏月大赦

詔大辟情可憫者以聞

令諸庫勿進都數

如中使宣取錢物但畫時供應不得以見管都數供報如違主典處死監官決配舊制庫務都三司使亦不得知丁謂充使日自陳支度經費宜知常數上勉從之仍令副使以下不得預聞

詔定茶法

自景德改茶法之後上封者多言不便丁謂曰未改法前歲虧茶本錢九千餘貫改法之後所收利不下

二百餘萬貫乃命馮拯王曾同三司詳定拯等尋皆以謹令崇信為言

先是三司言民有販茶違法者欲令同居告訐上曰以利而壞風俗非國體也不許

秋七月郭崇仁遷解州團練

崇仁守文子章穆皇后弟也時崇仁居母喪詔起復仍自昭州團練有是命崇仁雖外戚朝廷未嘗過推恩澤自是十年不遷

八月張詠卒

時以樞密直學士卒於陳州詠少倜儻有大志尚氣
節重然諾勇于為義上嘗稱詠才任將帥以疾不盡
其用詠臨終奏疏言不當造宮觀竭天下之財傷生
民之命乞先斬丁謂頭置國宮門以謝天下然後斬
臣頭置丁氏之門以謝謂上亦不以為忤詠嘗語人
曰吾榜中得人最多謹重有雅望無如李文靖深沈
有德鎮服天下無如王公面折廷爭素有風采無如

寇公當方面寄則詠不敢辭

冬十二月皇子冠

封壽春郡王進封昇王

尋置壽春郡王友以張士遜崔遵度為之士遜平雅和謹澹於勢利遵度修起居注踰十年立殿墀上常退匿楹間慮上見之搢紳推其長者初大臣欲以二人為翊善記室上曰翊善記室府屬也王皆受拜故以王友命之令王每見答拜示賓禮之意

士遜嘗對王旦稱王學書有法旦曰公為王友職止
于是耶士遜愧謝

是歲注輦國來貢

使者言其國東距海五千里西至天竺一千五百里
南至羅蘭二千五百里至頓田三千里舟涉一千五
百日乃達廣州約其道路蓋四十一萬一千四百里
其國主曰十年來海無風濤中國其有聖人乎於是
遣使入貢其所上來詞致如中國云

丙辰大中祥符九年春正月以張旻為宣徽南院使兼樞密副使

是時任馬軍副指揮使被旨選兵下令太峻兵懼謀為變上密召二府議之王旦曰若罪旻則帥臣何以御衆急捕謀者則震驚都邑陛下嘗欲任旻樞密臣未敢奉詔今若擢用使解兵柄反側者自安上喜曰王旦善處大事真宰相也

二月置資善堂

詔以皇子就學之所名資善堂上作記刻石堂中
召近臣觀書

于翔鸞閣

三月召宗室觀書

于玉宸殿翌日復召宴射

授李遵節度使

一名立遵西番宗噶爾族首領也

夏六月謁會靈觀

秋七月蝗

上詣景靈宮開寶寺祈禱先是上出死蝗以示大臣已而執政有袖死蝗以進者請示於朝率百官賀王旦曰蝗出為災災弭幸也又何賀焉固稱弗可于是二府方奏事飛蝗蔽天上顧謂旦曰使百官方賀而蝗若此豈不為天下笑耶時遣中使督諸州捕蝗又分路按視蝗傷悉除其租上減膳蔬食不舉樂蝗傷纔十二飛蝗之過京城也上方御膳見蝗勢障日

意甚不懌乃命徹膳聖體自是不康

八月陳堯叟罷

為右僕射堯叟強力明辨多任智數久典樞密軍馬之籍悉能周記

九月秦州屬羌寇邊曹瑋敗之

嘉勒斯賚宗噶爾立遵等三萬人入寇至三都瑋時知秦州即領軍擊敗之二族在秦西南頗强悍先是嘗求贖普名目瑋請勿許朝廷猶以為保順節度瑋曰我

狃遵矣先為之備乃誘致其蕃部以弱之于是有三都之捷其後又破滅諸羌二族以窮孤逃入磧中瑋斥境隴上置十塞自是秦人乃安

先是翰林學士李迪召對龍圖閣草詔書上徐謂迪曰曹瑋在秦州屢請益兵未及遣遽辭州事邊將誰可代瑋者對曰瑋知嘉勒斯賚欲窺關中故請益兵為備非怯也且瑋有謀諸將皆非其比陛下重發兵豈非將上玉皇聖號惡兵出宜秋門耶今關右兵多可

會其羨益發赴瑋上因問關右兵幾何對曰臣向在陝西以方寸小冊書兵糧數備調發今猶置佩囊中上令自探取目內侍取紙筆具疏某處當留兵若干餘悉赴塞下上顧曰真所謂頗牧在集中未幾嘉勒斯賚果犯邊秦州方出兵復召問曰瑋戰克乎對曰必克及捷書至上謂迪曰卿何料之審也迪曰嘉勒斯賚大舉入寇使諜者聲言以某日下秦州會食以激怒瑋瑋勒兵不動坐待其至是則以逸待勞臣用此知

其決勝也

禁貢瑞物

冬十一月石普抵罪

普時知許州上言日當食又言嘉勒斯賚陰報曹瑋請以臣所獻陣圖付瑋可使必勝也初上方崇符瑞普請罷天下醮設歲可省緡錢七十餘萬以贍國用遂忤上意于是上益怪普言踰分而王欽若謂普欲以邊事動朝廷又言日食不驗除名配賀州普憫儻有

膽略兩平蜀盜大小數十百戰人服其勇

以李及知秦州

瑋自知秦州遷為秦州都部署上問王旦誰可代瑋者旦薦及衆謂及雖重厚非守邊才及至秦州有禁軍白晝掣婦人銀釵於市及方觀書立命斬之觀書如故聲譽達京師楊億以告旦旦曰是固當斬烏足為異政乎旦之用及者其意非在此也以及之重厚必能守瑋規模而已及性清介所治簡嚴喜慰薦下

吏而樂道人善後知杭州不事燕遊一日冒雪出郊
衆謂當置酒召客乃獨造林逋清談至暮而歸居官
數年未嘗市吳物比去惟市白樂天集

召近臣觀書

於龍圖閣

丁巳天禧元年春正月朔上玉皇聖祖寶冊

尋出聖祖金寶牌給京城寺觀天下名山

恭謝南郊

大赦

兩浙提刑范應辰上言姦凶之輩密料赦期發其宿憾或挺刀殺人或縱火焚舍尋亦除罪又配為卒伍皆給衣糧是何異賞人為盜者耶

先是上嘗謂宰相曰為國之要在乎賞當其功罰當其罪不任情於其間則賞罰必當懲勸必行萬方必理和氣必生自然天地降祥四方無事以此思之可不戒乎

二月增諫官御史員

詔別置諫官御史各六員不兼他職月須一員奏事
或有急務聽非時入對三年則絀其不勝任者尋以
劉燿為右正言劉平為監察御史魯宗道為右正言
皆用新詔也

李公蘊封南平王

召馮元侍講

講易於宣和門北閣待制查道李虛已李行簡預焉

自是聽政之暇率以為常因數訪大臣能否而行簡
無怨昵必盡稱道其長人推其長者

陳彭年薨臨其喪

涕泗良久時為參知政事彭年敏給強記好儀制刑
名之學素姦諂號九尾狐張齊賢在相位彭年嘗求
為理寺詳斷官一見輒不可曰此人在朝必亂國政
或疑齊賢過甚後乃服其知人

夏五月以仍歲旱蝗遣使分路安撫

時諸路百三十州皆言蝗蝻食苗遣內臣督州縣分捕先是上謂宰相曰去歲旱蝗秋稼不稔今春時雨未降朕夙夜驚懼未嘗暫忘豈非政令有爽天意因思茶鹽條禁頗為峻刻或行之已久難於遽改削其尤不便民而傷於厚斂者可也

右正言魯宗道言今天下親民之官孜孜于民政者十不一二宜妙選英哲委以親民之任上曰謹擇牧宰實朝廷之急務也

先是龍圖閣待制張知白上言亦謂朝廷每除牧伯皆避命致訴比遣外任多是累貶之人風俗不澄實由於此因求補外職不許

秋七月王旦罷

為太尉兼侍中昭應宮使旦以疾求解故也聽五日一赴起居旦後懇請去不已上曰朕覺體中不佳方欲以大事託卿而卿疾如此奈何因命皇子出拜旦言皇子盛德必能任陛下事遂薦可為大臣者十

餘人其後不踐兩府者獨凌策李及

薛奎常為江淮發運辭旦旦云東南民力竭矣奎退
曰真宰相之言張士遜為江西轉運旦謂曰朝廷權
利至矣故士遜所至未嘗敢求利

散監牧馬

時仍歲旱蝗向敏中言國家監牧馬數萬廣費芻粟
若令出賣散於民間緩急取之猶外廐耳從之

八月以王欽若同平章事

先是上欲用欽若王旦言祖宗朝未嘗使南方人當國雖古稱立賢無方然必賢士乃可上遂止欽若嘗語人曰為王子明故使我作相晚却十年

九月李迪參知政事

上嘗憂旱蝗歲用不給迪曰祖宗置內藏正欲復西北故土及支凶荒上曰當出金帛數百萬借三司迪曰天子於財無內外何必曰借上悅迪又言陛下東封時敕所過無伐木除道即驛舍或州治為行宮才

令加塗墜而已及幸汾亳土木之役過往時百倍今旱蝗之災殆天意以儆陛下也上曰卿之言然有誤朕為此者

王旦薨臨其喪

贈太師中書令諡文正

旦尋以冬至日葬先是太常禮院言宰相出殯當輟視朝王旦以是日葬望準禮例中書言其日皇帝已有詔不受朝賀遂不下輟朝之命議者謂其日當罷

百官拜表之禮時王欽若與旦不協故抑之

旦性冲澹寡欲奉身至薄所居陋甚將死不為宗戚求官咸平初旦聞李沆之言固未深信及親王欽若丁謂等所為諫則業已同之欲去則上遇之厚乃嘆曰李文靖真聖人祥符以來每有大禮輒奉天書以行常悒悒不樂既寢疾遺令削髮被緇蓋悔其前之為也論者謂旦得君言聽諫從安於勢位而不能以正自終或比之馮道云

旦居相位王曾等嘗乘間謂旦曰曾等在政府每見奏事其間亦有不經上覽公但批旨行下恐人言之以為不可旦但遜謝而已一日曾等以前說聞于上上曰朕嘗諭旦小事一面專行卿等當謹奉之曾退謝旦曰上之委遇非曾等所及知也

中書嘗請以知制誥盛度權知開封府上曰可更問王旦旦時屬疾在告中曰度必不樂此任既而度果不願處繁劇上曰王旦銓量才品極當豈可不問也

有日者上言宮禁事被誅并得朝士占問簡尺上欲
案之且曰此人常情且語不及朝廷不足究治因自
取舊所占書進曰臣賤時不免為此必以為罪願并
下事遂寢既而大臣復欲因是擠其所不快者力請
究治上令就取則已悉焚之矣

趙德明嘗以民飢上表乞糧數百萬羣臣皆請降詔
責之且曰臣欲詔德明云已敕三司在京積粟百萬
可遣衆來取上喜從之德明受詔再拜曰朝廷有人

契丹請歲給外別假銀幣上以問旦旦曰東封甚近
欲以此要朝廷耳乃請于此給三十萬內各借三萬
契丹得之大慚

宦者劉承規病求節度使上諭旦旦曰陛下所守者
祖宗故典典故所無不可聽也當問諸有司翌日上
復言之旦曰若如所請後將有求為樞密使者矣此
必不可上乃止承規卒猶追贈焉承規即承珪也

邊肅嘗坐賊貶向敏中謂旦曰邊同久責已久牽復

可乎旦曰為近臣坐贓豈得更陞進耶敏中語數及之旦曰必欲用須旦死可也至是始以赦叙復

上嘗召李行簡命為太子中允致仕叅政穆子也冲澹不樂仕進上特召對而命之初召行簡使者不知所止上令問旦旦匿名迹遠權勢後史官修真宗寔錄得內出奏章乃知朝廷士多旦所薦

冬十月詔災沴不以聞者論罪

十二月詔治河勿調丁夫

以役兵充

戊午天禧二年春正月宴宗室

於資善堂

振河北飢

詔發廩及漕江淮米十萬石振之

宴從臣

及壽春郡王府官屬于資善堂出御製恤黎民等歌

賜壽春郡王

二月京西饑

三月修京城

夏四月作祥源觀

有言拱聖營真武祠側湧泉瘳疾者詔建祥源觀任
布上言不宜以神怪眩愚俗劉燧亦言前世傳聖水
者皆詭妄並不報

六月彗出北斗

秋七月大赦

欽定四庫全書

以天文示變故也

以李士衡為三司使

上作寬財利論賜之士衡方進用王欽若害之會上
論時文之弊欽若因言路振文人也然不識體李士
衡父誅死而振為贈告乃曰世有顯人士衡以故不
大用

八月立昇王受益為皇太子

賜名禎尋賜以元良箴

謁太廟日有左右珥黃雲捧日

大赦

冬十月詔定茶法

因左諫議大夫孫奭之請也奭言茶法屢改非示信之道即詔奭與三司裁定務從寬簡未幾奭出知河陽事遂止奭初自密州還時方置天慶等節天下節設齋醮張燕費廣奭請裁省浮用不報遂復出其居朝廷蓋不周歲云

十一月召近臣觀書

于太清樓

天禧三年春二月河南府地震

三月戊午朔日有食之

親試舉人

賜王整以下一百四十人及第出身有差

元年魯宗道言進士詩賦不近治道諸科對義但以
念誦為工乃申明前詔進士兼取論策諸科能明經

者別與考較

天書降乾祐山夏四月迎入內

寇準鎮永興朱能為都巡檢使能好造符命託神靈而外附準至是準奏天書降乾祐山中蓋能使為也上迎奉焉羣臣無敢言者孫奭時知河陽上言朱能姦憝小人天下皆知能所為獨陛下一人不知耳乞斬能以謝天下上亦不之責

以夏守恩劉美為四廂都指揮使

守恩為捧日天武四廂美為神衛龍衛四廂時上不
豫中宮預政故守恩進用也

國朝殿前司捧日天武馬軍司龍衛步軍司神衛謂
之上四軍各有左右廂每廂各有都指揮使廂各三
軍每軍五指揮一軍又各有指揮使一員都虞候副
之捧日天武龍衛神衛又有第四軍處所退年高者
無節都指揮使止有都虞候殿前司又有神勇宣武
驍騎各上下軍軍十指揮又有寧朔驍勝各十指揮

虎翼左右各五軍軍十指揮並有都指揮使都虞候
馬軍司則有雲騎武騎各十指揮步軍司則有虎翼
左右各五軍軍十指揮每軍各有都指揮使一員都
虞候副之每遇大禮後各以次補遷凡軍校遷至軍
都指揮使又遷則遙領刺史又遷為廂都指揮使遙
領團練使員溢即從上落軍職為正團練使刺史之
本任或為他州部署鈐轄其老疾若過失者為御前
忠佐馬步軍都軍頭副都軍頭隸軍頭司甚者出為

外州馬步軍都指揮使

復命臺諫兼他職

右正言劉燧判三司戶部勾院監察御史劉平章顏
兼鹽鐵度支判官或言燧等兼他職執政蓋不欲其
專任言也諫官御史于是復兼他職

六月王欽若罷

欽若恩遇衰人有言其受金又與道士蓄禁書者往
來故罷

河決滑州

灌澶濮鄆濟至徐州入淮

以李允則知鎮州

允則在雄州十四年治城壘不輟契丹以為疑詔詰之
允則奏言初通好時不即修治他日復安敢動乎允
則又縱競渡以寓水戰列畦壟植榆柳地益險阻當
時邊臣鮮能及常燕軍中而甲仗庫火允則作樂行
酒不輟副使請救不答少頃火熄命悉瘞所焚物密

遣吏持檄瀛州以茗籠運器甲不決旬其數已完人
無知者樞密院請劾不救火狀上曰允則必有謂姑
詰之對曰兵械所藏燬火甚嚴方燕而燔必姦人所
為舍燕救焚事或不測一日民有訴為北人毆傷而
遁者允則不治與傷者錢二千衆以為怯逾月幽州
以其事來詰答以無有蓋他謀以毆人為驗比得報
以為妄乃殺諜

以寇準同平章事

準之始召也將行其門有勸準者曰公若至河陽稱疾堅求外補此為上策倘入見即發乾祐天書之詐斯為次也最下則再入中書為宰相爾準不懌揖而起既至遂拜平章事時丁謂為參政事準甚謹嘗會食羹污準鬚謂起拂之準笑曰參政國大臣乃為官長拂鬚邪謂甚愧之由是傾誣自此萌矣

秋八月大赦

以天書再降乾祐縣也

馬知節卒

時以彰德軍留後卒于湘州知節慷慨以方畧自任
又能好書賓友儒者所與交善必一時豪杰年十八
監彭州兵馬以嚴飭見憚如老將性剛直敢言無避
不肯少有卑屈嘗與王欽若爭論上前退見王旦詞
色猶怒甚曰知節幾欲以笏擊死之但恐驚動君相
爾東封以後上每出幸必以知節為都部署許以專
殺知節部分嚴明未嘗輒戮一人

大會道釋大安殿

凡萬三千餘人先是建道場上親臨視賜以藥銀大錢

京東河北水

遣使安撫

冬十一月除犯酒麴銅鑰等死刑

辛未郊

十二月富州蠻納土詔却之

庚申天禧四年春正月以曹瑋為宣徽北院使鎮國留
後簽署樞密院

簽署兼藩鎮始此

二月江淮浙利路飢

遣使安撫

滑州決河塞

是役凡用兵夫九萬人上親製碑紀之

三月益梓路飢

遣使安撫

向敏中薨臨其喪

敏中端厚多智善處繁劇識大體密靜遠權門無私
謁諸子不令釐務雖當大事若已不與焉謹於采納
不妄推薦當時以重德目之

夏四月大風晝晦

分江南轉運為東西路

楊億復翰林學士

初億自汝州還久之不遷或問王旦曰楊大年何不
且與舊職旦曰大年頃以輕去上左右人言可畏賴
上保庇之今此職欲出自清衷以全君臣之契耳踰
六年乃復入禁署

億卒于是冬億性耿介坦夷重交遊崇尚名節然評
品人物善惡太明人多怨之億文章為時宗名聞外
夷後贈禮部尚書諡曰文

冠準罷

為太子太傅萊國公先是準為樞密使曹利用副之
準素輕利用議事有不合者輒曰君一夫爾豈解國
家大體耶於是丁謂與利用共排準又翰林學士錢
惟演亦附謂時上不豫政事多中宮所決謂等交通
詭祕其黨日固劉氏宗人橫于蜀上以皇后故欲赦
其罪準請必行重失后意謂等因媒藥之準嘗請問
言皇太子人望所屬願傳以神器丁謂小人也不可
以輔少主上然之既而準被酒漏言謂等懼力請罷

準上不記與準初有成言可其奏

六月河復決滑州

親試舉人

御崇政殿親試禮部奏名舉人命官覆試如常例授三班奉職者九十二人借職者十三人餘補諸州上佐文學自奉職至殿侍悉免遠使與家便差遣

秋七月以李迪為平章事

馮拯樞密使同平章事

錢惟演言拯純和與寇準不同故也上欲加拯吏部
尚書參知政事將草制誤召楊億故事參知政事舍
人草制樞密使同平章事學士草制因以樞密使命
拯于是樞密院領使凡三人上徐覺其誤惟演遂勸
遷曹利用丁謂遷中書

丁謂平章事曹利用加同平章事

皆用錢惟演之言也

內侍周懷政伏誅寇準貶

授太常卿準既罷上所以待準者猶如故丁謂等益懼會周懷政伏誅準乃遠貶初懷政嘗與上謀以太子監國出告準及準以謀泄罷相謂等因疎斥懷政懷政謀殺謂等復相準奉上為太上皇傳位太子而廢皇后召楊崇勲等諭之崇勲詣謂第告變曹利用入奏令衛士執懷政訊鞫具引伏斬之懷政既以謀逆伏誅有欲并責太子者上意惑之李迪從容奏曰陛下有幾子乃為此計上大悟

準之貶也上初命與小州謂輒云與遠小州迪言向者聖旨無遠字二人忿鬪盖始此朝士與準親厚者謂必斥之楊億尤善準始謀以太子監國屬億草制億夜屏左右為之辭至自起剪燭中外無知者既而準以被酒漏所謀獲貶謂召億至中書億懼甚不知所為謂素重億徐曰謂當改官煩公為一好詞爾億乃稍安

謂等并發天書事詔捕朱能能殺使者叛逸衆潰窮

感自殺準坐能叛再貶道州司馬準至道州晨具朝服如常時起樓讀書每賓至言笑自若若初無廊廟之貴者三紬皆非上本意歲餘上忽問左右曰吾目中久不見冠準何耶左右莫敢對上崩乃貶雷州

九月大赦

冬十月初隻日視事

中書門下言機務清簡請依唐制隻日視事雙日不坐從之

十一月建天章閣

以藏御製

編聖政錄

命錢惟演等取時政記中盛美之事別編之

丁謂李迪罷謂復相

謂既擅權至除吏不以聞迪語同列曰迪起布衣十
餘年位宰相有以報國死且不恨安能附權臣為自
安計乎謂欲以林特為樞密副使迪爭之因詬謂引

手板欲擊謂謂走得免及入對斥言謂姦邪願同下
憲司置對又言寇準無罪罷斥朱能事不當顯戮又
言錢惟演謂之姻家願與惟演俱罷政柄曹利用馮
拯亦相朋黨時上怒甚欲付御史臺利用拯曰大臣
下獄不惟深駭物聽況丁謂本無分競之意乃各降
秩一級罷相謂知河南府迪知鄆州制書未出謂入
對乞留因賜坐左右欲設墩謂顧曰有旨復平章事
乃更以杌子進於是復視事仍詔迪即時赴鄆州謂

始傳詔召劉筠草復相制筠不奉詔乃更名晏殊筠
既自院出遇殊殊側面不敢揖盖內有所愧也先是
上久不豫語或錯亂嘗盛怒語輔臣曰昨夜皇后以
下皆之劉氏獨留朕宮中迪進曰果如何不治之
后適在屏間聞其言由是惡迪迪所以不留亦上不
豫中宮意也

兩府會議資善堂

詔合取旨事如故自餘常事委太子與兩府會議施

行訖奏初議欲令太子總軍國事丁謂以為不可曰
即日上體平朝廷何以處此迪曰太子監國非古制
耶力爭不已迪既罷出故有是詔

十二月嚴內侍傳旨覆奏法

發京師常平倉

以穀貴減其直

御承明殿

上不豫力疾御殿賜宰相手書諭以輔導儲貳之意

辛酉天禧五年春正月上疾愈

幸啟聖院

寬罪繫

詔天下犯死刑者遞減流以下釋之

遣使撫京東水災

宴近臣承明殿

二月審刑院奏刑措

親試舉人

欽定四庫全書

九朝編年備要

四十三

賜天下酺

三月賜京東西民租

以水災賜租十之五

夏四月客星出軒轅

五月慮囚

犯死刑者遞減有差

秋七月甲戌朔日有食之

冬十一月以丁謂為譯經使兼潤文

十二月置同勾當三館祕閣以內侍皇甫繼明為之
咸平中命內臣劉崇超監館閣圖籍至是丁謂改曰
勾當公事內臣遂與大學士同職矣

壬戌乾興元年春二月大赦

移南郊恩賞先此頒行

上崩於延慶殿

年五十五在位二十六年諡曰文明章聖元孝廟號
真宗

皇太子即皇帝位尊皇后為皇太后

楊淑妃為皇太妃軍國事權取太后處分遵遺制也
丁謂欲去權字王曾曰政出房闥斯已國家否運稱
權尚足示後且言猶在耳何可改也謂乃止曾又言
尊禮太妃遽須他日議之不必載遺制謂拂然曰參
政顧欲擅改制書耶曾復與辨而同列無助曾者亦
止時中外洶洶曾正色獨立朝廷賴以為重曾援東
漢故事請五日一御承明殿太后坐左皇帝坐右垂

簾聽政既得旨而謂獨欲皇帝朔望見羣臣大事則
太后與上召對輔臣決之非大事悉令雷允恭傳奏
畫可曾曰兩宮異處而柄歸宦者禍端兆矣謂不聽
蓋謂不欲令同列預聞機密故潛結允恭白太后卒
行其意

大赦

百官進秩丁謂加司徒馮拯司空曹利用左僕射並
兼侍中任中正王曾錢惟演並加尚書張士遜加侍

郎曾謂謂曰中書令至諫議大夫平章事其任一也
樞密珥貂可乎今以數十年曠位之官一日除授得
無公議乎謂不聽

寇準李迪曹瑋竄黜

準雷州司戶迪衛州團練副使瑋知萊州連坐者甚
衆皆丁謂之謀也王曾疑責太重謂熟視曾曰居停
主人恐亦未免耳蓋曾嘗以第舍假準也曾蹶然遂
不復爭謂惡準迪必欲置之死地遣中使賫勅往以

錦囊貯劍揭馬前既至道州準方與郡官宴飲中使入傳舍久之不出問所以來之故不答上下皆皇恐不知所為準神色自若使人謂之曰朝廷若賜準死願見勅書中使不得已乃授勅準從錄事參軍借綠衫著之拜於庭升階復宴飲至暮乃罷使至鄆州迪聞其異於他日即自裁不殊或饋之食中使輒不與迪客鄧餘怒曰汝殺我公我必殺汝從迪至衛州不離左右迪由是獲全或語謂曰迪若貶死公如士論

何謂曰異日好事書生弄筆墨不過曰天下惜之而已

三月定視朝及講讀日

中書請自禪祭後隻日於崇政殿或承明殿視事雙日如先帝故事前後殿皆不坐詔雙日雖不視事亦宜召近臣入侍講讀

作受命寶

曰皇帝恭膺天命之寶命王曾書之

夏四月限伎術官

中書言舊制翰林醫官圖畫琴棋待詔轉官止光祿寺丞天禧四年乃遷至中允贊善洗馬同正請勿踰此制雖特恩即至國子博士而止

六月內侍雷允恭伏誅丁謂罷

用王曾之請也初司天監邢中和言山陵上百步法宜子孫允恭擅移皇堂事覺伏誅

初王曾以計給同列請獨對直言謂包藏禍心令允

恭移皇堂于絕地太后大驚欲併誅謂馮拯為之請
乃止行降黜故事宰相罷相皆降制時亟欲行止召
當直舍人草詞仍榜朝堂布諭天下謂所坐但私庇
允恭不忍破其妄作未必真有禍心也然天資險狡
多陰謀得政歲久要不可測雖曾計傾之而公論不
以為過也林特等八九人皆坐謂黨落職補外

謂尋貶崖州司戶坐嘗教女道士劉德妙託道君言
禍福也諸子並勒停三弟悉降黜詔臣寮有曾與謂

往來者一切不問

始謂命宋綬草寇準責詞綬請其故謂曰春秋無將
漢法不道皆證事也綬雖從謂指然卒改易謂本語
不純用及謂貶綬猶當制即草詞曰無將之戒舊典
甚明不道之辜常刑罔赦朝論快焉

謂初逐準京師為之語曰欲得天下寧當拔眼中丁
欲得天下好莫如召寇老不半歲謂亦貶道出雷州
準遣人以一蒸羊逆之境上謂欲見準準拒絕之聞

家僮欲報仇即杜門使縱博度謂行遠乃罷

秋七月以王曾為平章事

王旦嘗語其家人曰王君介然他日德望勲業甚大且曰王君昨讓會靈觀使頗拂上旨而進對詳雅詞直氣和了無所懼我自任政事幾二十年每遇上意稍忤則蹙縮不能自容以是知其偉度矣

呂夷簡魯宗道參知政事

宗道真宗時為正言多風聞彈奏上稍厭之一日自

訟于上前曰臣在諫列而諫奈何以數厭之上悅其忠御筆題殿壁曰魯直後權判流內銓患銓格煩密及知吏姦狀多釐革之

宗道剛正疾惡少容遇事敢言不為小謹嘗就飲酒肆使者至令以寔告曰飲酒人之常情欺君臣子之大罪真宗以為忠實可大用嘗以語太后太后識之於是并夷簡皆首蒙拔擢

錢惟演樞密使

惟演舊位王曾上曾既入相惟演亦加樞使故事樞密使必加檢校官惟演但以兵部尚書充使有司失之也未幾馮拯言惟演以妹妻劉美實太后姻家不可與政遂罷之

八月太后同御殿垂簾

用王曾議也同御承明殿百官來賀太后哀慟令內侍宣諭曰候上春秋長即當還政

馮拯為首相欲躡丁謂故迹曾曉以禍福且逆折之

拯不敢肆自是事一決于兩宮

初謂定太后稱予謂敗中書與禮儀院參議每下制稱予而使殿處分稱吾太后詔止稱吾尋以太后生日為表寧節

冬十月葬真宗於永定陵

祔廟以莊穆皇后配

始丁謂請名陵曰鎮陵及謂貶馮拯謂三陵皆有永字故易曰永定陵然永定乃縣名也宣祖陵止名安

陵又不知翼祖已名定陵於是復追改翼祖陵為靖陵議者譏拯不學當時無正之者

天書皆從葬用王曾呂夷簡之議也

尋以李沆王旦李繼隆配饗廟庭

時上雖用以日易月之制改服臨朝宮中實行三年之喪

十一月李士衡罷

自三司使出知相州士衡屢以足疾求罷太后諭之